

Henti serta-merta tindakan tatatertib mahasiswa isu kebebasan bersuara – KPT

Oleh Berita Harian-August 28, 2026 @ 10:06am



KUALA LUMPUR: Semua prosiding tatatertib terhadap mahasiswa berkaitan kebebasan bersuara, pernyataan pandangan, kritikan awam dan perhimpunan secara aman di universiti awam diarahkan dihentikan serta-merta. Kementerian Pendidikan Tinggi (KPT) berkata, langkah itu selaras dengan keputusan

kerajaan memansuhkan Akta Universiti dan Kolej Universiti (AUKU) 1971 bagi memperluas kebebasan mahasiswa dalam bersuara, berpersatuan dan menjalankan aktiviti pelajar.

KPT menegaskan kebebasan mahasiswa perlu dilaksanakan bersama tanggungjawab serta mematuhi undang-undang. Bagaimanapun, kesalahan membabitkan keganasan, vandalisme, kerosakan harta, jenayah, salah laku akademik atau pelanggaran tatatertib yang sah masih tertakluk kepada undang-undang dan peraturan berkuat kuasa, selaras usaha membentuk ekosistem pendidikan tinggi yang lebih terbuka, tersusun dan inklusif.